

欽定剿平三省邪匪方略

欽定剿平三省邪匪方略正編卷一百九

己未年

七月初七日

癸亥

勒保奏言據朱射斗報稱辛聰

一股賊匪已由墨家山竄入老林探得包正洪

復由雞鳴寺折竄雪覆山向東南奔逸該鎮卽

由謝家壩一帶迎截十六日至厚葉溝地方正

值該匪等在彼四散掠食一見官兵紛紛潰逃

當卽殲斃七十餘名生擒莫以才等十三名該

鎮連夜追躡十九日追至毛坪匪衆見該處山勢險要欲圖恃險抗拒朱射斗即督同副將王清弼叅將張文貴等分兵三路圍攻賊匪俱在半山擲石放鎗我兵鼓勇競上鎗箭並發立斃執旗騎馬賊目二人賊匪四五十名餘衆潰遁追殺二十餘里沿途又斃賊三百餘名生擒並投出男婦五百餘名口訊據獲犯徐昭文等均

稱親見包正洪鎗傷右乳身死隨令該犯等指
認屍身屬實當卽割取首級並派都司王之鑑
將徐昭文等押赴臣營驗訊無異所有現獲各

犯除將從逆日久之一百三十八名正法餘俱
訊係被脅酌給銀米路票回籍安插惟包正洪
之弟包三率領餘匪數百人竄入大寧之尖山
壩一帶臣又飛飭朱射斗必須追捕盡淨現在

夔州所屬奉節大寧雲陽巫山各境均有賊匪
游奕七十五等所帶兵勇堵則有餘剿實不足
署夔州府曹庠業因前奉脅從罔治之

諭旨所貼騰黃告示均被教匪探馬到處揭匿不使
被脅之人看見以致解散無多是以於投出難
民內擇其明白勇敢之人令其密帶騰黃告示
分投散播互相傳看兩旬來統計夔建卜三聘

張添倫等夥內散出難民實有四千三百餘名
並有被脅之趙耀宗王賜馬紹恕周昌倫等首
先倡義將賊目龔國發李雲龍徐必勝等殺死
投出者均經該署府給與盤費遣令回籍安插
趙耀宗等四人_臣已飭令照謝春富等之例給
與八品頂戴以示獎勵現在朱射斗追捕包正
洪股內餘孽已入大寧而德楞泰亦以追殺張

添倫幸聽顏中考等至大寧境內據報亦得勝
仗正可乘勢與朱射斗合兵將各股匪衆聚而
殲洗額勒登保現追王登廷至渠縣境內一俟
日內續有捷報卽行隨時奏

聞至此次朱射斗一路打仗惟守備李錦麟外委劉
應魁身受石傷其餘傷亡兵勇另行查明咨部
同日松筠奏言查藍號賊匪經恒瑞廣厚吉蘭

秦等屢次剿殺竄出甘境由陝省之畧陽沔縣
西竄經遊擊楊國林等帶兵在寧羌廣元界上
截剿該匪遂向東南奔竄由寧羌州之胡家壩
翻山竄入南江縣境臣已飛咨勒保轉飭川北
帶兵將領相機剿辦並經恒瑞派委正定鎮總
兵觀祥帶兵於寧羌州之大安驛駐紮防守藍
號白號賊匪均可不致折竄陝境至張漢潮賊

匪西竄至鳳縣葦子坪逼近棧道永保帶兵由
峽石迎擊賊遂折向北竄適恒瑞業由南星地
方北折與慶成分路由鳳縣之白石舖草涼驛
一帶迎擊明亮亦已躡蹤前來合剿自可迅速
蕞事所有平利界上之三股賊匪兩股已竄鎮
坪八仙河兩處卽係界嶺距縣尙遠一股在孟
石嶺距縣僅一百餘里現經慶溥溫承惠分帶

兵勇由西北兩面向東南堵剿可期不致闖入
其西鄉界上竄匪一股業已折回陝境十字壩
又遇川北通江竄來之阮添元一股合夥復竄
入草葢寺至魯家壩屯紮又有一股賊匪于司
舉由通江至黛池壩屯紮其觀音堂之賊亦竄
至混人坪現經王文雄派令遊擊關聖保等堵
截堰口防其北竄復自帶兵勇於楊柳山峽口

罐子山各要隘往來巡查堵禦賊匪不能深入
惟是西鄉邊界延長路徑紛岐王文雄兵力尙
單柯藩帶兵一千名駐守紫陽未可輕動現在
寧羌境內既有觀祥帶兵駐紮大安則楊國林
等所帶兵一千六百名儘可抽派臣遂札飭楊
國林仍駐寧羌與觀祥聯絡聲勢撥出兵丁一
千名卽令遊擊阿克東阿帶赴西鄉交王文雄

添防隘口臣仍札知王文雄柯濟慶溥溫承惠

等以堵爲剿勿致賊匪乘間竄入一俟明亮恒

瑞慶成永保將張漢潮一股殲滅即可移兵剿

辦邊界賊匪至臣前奉

諭旨令籌議陝省此時應否添調兵丁臣再四體察

通盤籌畫現在陝省漢江以北止有張漢潮一

股兵力亦俱聚於此若旬日之內成功便可移

此得勝之師分路南下不獨剿滅西鄉平利界
上之賊並可與額勒登保德楞泰夾擊川北川
東諸匪自無庸添調生兵致滋糜費倘或張逆
稽誅明亮等一時不能得手莫若竟調撒拉爾
回兵一千名先爲賞給安家銀兩派委甘省熟
諳夷情之文武員弁帶領前來協剿張逆可期
得力如再不敷用立秋後天氣涼爽更可添調

阿拉善蒙古馬兵一千名定可擒獲張逆恭候
皇上訓示遵行

松筠又奏言據蘭州軍需局布政使楊揆蘭州
道蔡廷衡等詳稱甘省節次派赴川陝官兵及
本省進剿官兵不下三萬餘名其官員兵丁應
行借支俸賞行裝及運送軍火器械等項嘉慶
元年三年兩次部撥甘省銀一百萬兩業已動

用無存本年剿辦張漢潮及藍號白號賊匪所
有官兵鹽糧及守城鄉夫口食以及運夫騾脚
價值多係借用藩庫兵餉發給其鞏秦階三屬
被賊焚掠難民尤應卽時賑撫臣詳細確查並
無浮開情弊合無仰懇

皇上天恩俯准飭部撥銀一百萬兩解送甘省應用
惟是部餉到甘尙需時日所有借用兵餉及撫

郵等項均難稍緩自應通融籌辦請於陝餉一
百五十萬兩內先行借撥甘省三十萬兩以濟
急需俟部餉解到卽當截撥歸欸此次所請部
餉卽交楊揆蔡廷衡及專辦撫郵之陞任鞏秦
階道王銀等務期事事撙節應用並令將前次
餉銀截清月日逐欸核明開造細冊臣仍細加
查核總期實用實銷均奏入

上諭內閣曰朱射斗追剿包正洪一股賊匪殲賊甚
多首逆中鎗身死此次打仗將領官兵等奮勇出
力甚屬可嘉朱射斗著賞給騎都尉世職該鎮所
帶兵丁俱賞一月錢糧以示鼓勵所有出力將弁
等並著勒保查明保奏再降諭旨

上命軍機大臣傳諭勒保曰朱射斗在小毛坪地方
分路圍攻包正洪中鎗身死斃賊多名所辦尙好

惟包正洪之弟包三率領餘匪數百竄入大寧之
尖山壩尙未全行剿盡應卽飭令朱射斗乘此勝
勢迅速追捕務將逸匪悉數殲除一俟撲滅此股
卽就近赴德楞泰一路協剿張添倫或助七十五
兜擒徐添德李樹等股直入楚境以期速獲渠魁
至招撫脅從難民一事據稱教匪探馬到處將膽
黃告示揭去被脅之人無從看見以致解散無多

賊匪狡譎情形實爲可恨勒保於難民內擇其明白勇敢者密帶告示分投傳播散出者已有四千餘人其殺死賊目投出之趙耀宗等獎給八品頂戴所辦甚是此時惟當將投出者重加撫卹斷不可存吝惜錢糧之見并飭知各路軍營照此辦理亦解散賊衆之一法若使投出之人無可依靠自必仍去從賊轉堅其脅從之心矣總之從賊者必

應用剿投出者必宜加恩再據松筠奏藍號賊匪
由寧遠竄入南江自己與白號合夥前於白號折
竄南江時卽諭令勒保於雲貴廣東新到兵內酌
量抽撥派往截剿今藍號一股又已竄至該處究
係何員帶兵在彼堵截卽著勒保查明具奏

上又命軍機大臣傳諭松筠曰此時藍號白號賊匪
均不致折竄陝境其平利界上及通江竄來西鄉

各股賊匪有王文雄在彼督率將弁往來堵禦不能深入而松筠又令遊擊阿克東阿帶兵一千名前往添防所見亦是至擬調撒拉爾回兵一千剿辦張漢潮若不敷用再添調阿拉善蒙古馬兵一千協剿一節事屬可行如果張漢潮一股奔竄靡定未能卽就殲擒自應增添兵力但軍營剿賊機宜移步換形難以遠揣遙制此項兵丁應調應止

惟在松筠酌度形勢辦理現在張漢潮由鳳縣折
向北竄恒瑞慶成永保分投迎擊而明亮又已躡
蹤前來趁此機會正可會合截剿速擒此逆至藍
號白號均竄南江松筠當嚴飭陝甘邊界防堵各
員實力守禦其奏請撥餉一百萬兩現今戶部查
欵照數解往並准所請先於陝餉一百五十萬內
撥借甘省三十萬兩以濟急需

同日

上命軍機大臣傳諭吳熊光曰昨因湖北川陝兵力不敷已調派山西盛京兵丁赴營協剿由河南取道前往著該撫卽飭經過各地方妥爲照料應付並著吳熊光將派調大兵由河南前赴湖廣川陝剿賊聲勢壯盛情形先爲傳播使賊匪聞知不敢逼近豫省邊界倘陝境竄匪及闖入竹山竹谿之

賊或敢窺伺河南竄近邊界該撫卽可於此項兵
丁過境時酌量截留一二千以資堵剿之用若賊
匪離境已遠無須添兵防禦卽令全赴湖廣川陝
軍營不可留豫坐守

初十日

丙寅

慶成永保奏言甘境藍號之賊由階

州東竄相近棧道而張漢潮股匪又自五郎西
竄亦距棧不遠其意希圖竄合歸鞏

臣

永保先

儘現有之兵扼要堵截適松筠撥交臣慶成之

兵二千名趕到卽一併分撥要隘防堵探知藍

號之賊因棧內防禦甚嚴且尙不知張漢潮賊

股西來之信遂折向南竄恒瑞督兵緊追前進

臣慶成帶兵兼程趕至北棧與臣永保會合據

鳳縣稟報張漢潮股匪於二十三日竄至葦子

坪地方有奔竄廢邱關之勢該處西通楊家店

可以直達甘境倘該匪由彼竄過非闌入甘境
滋擾卽尋歸白號賊夥而棧內西通口隘極多
該匪等巧於趨避專投無兵處所奔突難以在
右安兵把守而廢邱關草涼驛兩處尤爲通甘

省要路

臣

永保隨於廢邱關帶兵迎擊

臣

慶成

連夜帶兵分往草涼驛要口探蹤抄擊途中掣
獲騎馬賊探二名訊知張漢潮差人分探棧內

何路有兵卽於無兵隘口西竄甘境臣等均卽

向東迎剿恐竄匪聞風折轉乘隙逃逸官兵不

免落後尙有黃牛舖東河橋等處均係該匪竄

走熟路當令副都統銜綸布春侍衛桑吉斯塔

爾等挑帶馬隊星夜由棧內沿山口隘邀擊並

飛札原在斜峪關防守之叅將海洪阿就近帶

兵馳赴協剿二十五日晚綸布春等冒雨行抵

黃牛舖之江龍溝口遇賊竄出奮力截擊賊匪
登時散竄雖殲斃無多而天已昏黑山徑陡滑
滾崖落澗者不下百餘人該匪等卽由老林向
東奔逸海洪阿已自斜峪關帶領兵勇問道探
蹤掩擊二十九日趕至黑水峪邊見賊匪正在
涉水競過溪河該叅將卽督兵施放鎗礮轟擊
斃賊數十名賊匪驚慌失措捨命撲渡山水溜

急淹斃男婦賊匪甚多官兵復乘勢奮力剿殺

斃賊一百餘名生擒趙華等三名其已經渡河

之賊仍沿山向東奔竄臣等分帶官兵趕緊兜

截沿途多有殲戮並有被脅投出者百餘人卽

分別妥爲安撫歸業張漢潮等仍奔入南山所

過沿山之蓋屋郿縣鄠縣邊境村堡居民前經

兩被蹂躪均已漸次復業正須培養生息臣等

在北面兼程兜截又有海洪阿帶兵緊追該匪等無暇停留並未焚掠其省城迤南近山一帶

臣等先已札知藩司馬慧裕臬司台斐音等酌

帶兵勇於從前增設營卡之處分布防範亦均

安堵惟臣永保途次接山陽商南等縣稟報張

漢湖賊夥自豫境折回西竄時尙有落後之賊

在該縣境內竄匿時出滋擾賊數約有七八百

人並非一同西竄等語今張漢潮大駭既已復

竄入山自必找尋落後之賊歸合臣等節次奏

明卽擬先辦此股嗣臣慶成屢奉

諭旨令赴叅贊明亮處協剿近日雖未得有明亮現

抵何處確信臣等現在一面設法剿辦並將日

內賊情知會明亮相機併力合剿奏入

上命軍機大臣傳諭慶成永保曰永保慶成擊剿張

漢潮一股所辦尙好伊二人竟當專注此股與明亮併力合剿不可因張漢潮業經遠遁入山卽捨而他顧或又改計剿辦藍白號賊匪及他股之賊致使張漢潮得以乘隙奔竄向來各路軍營往往於專剿本股之賊並未辦竣輒以別股賊匪緊要爲詞又復捨此賊彼以致隨賊奔馳究未辦竣一股皆坐此弊况以漢潮屢經官兵逼剿現已窮竄

今慶成等自西山東明亮自東而西前後夾擊正當趁此撲滅再騰出兵力擇要會剿尤不可以賊首張漢潮已就擒獲卽置餘匪於不問至藍號賊匪向南折竄究竟竄往何處並著查明具奏

上又命軍機大臣傳諭明亮曰現在陝省漢江以北祇有張漢潮一股往來游奕必須速行剿竣再辦別股此股賊匪本係明亮專剿何以慶成等向東

逼剿而不聞明亮向西迎擊又縱竄匪得人終而
山境耶現據慶成等奏已知會明亮相機合剿明
亮自己早經接到正可併力夾擊以期剿擒賊首
又據慶成等奏張漢潮西竄時尙有落後之賊在
山陽商南潛匿此等餘匪明亮會否剿淨此時惟
當以拏獲張逆爲重卽間有零星餘匪亦祇應酌
派將弁在彼搜捕明亮不可又因此停留致任首

逆乘隙遠遁坐失事機看來張逆已入南山必又
思窺伺商維不可不預防也

十一日

丁卯

明亮與肇奏言張漢潮股匪經

臣痛

剿之後不敢折回連日由藥壩九池壩等處山
徑分投亂竄又值大雨水漲浮橋觀木悉被賊
匪折毀臣紮後塔橋渡河兼程趕至太古坪探
得大隊賊衆雖於浮橋過河而驟馬尙在尚水

牽渡臣明亮立卽帶領索倫馬隊馳抵該處賊

匪一見將浮橋拆斷拋棄騾馬遁逃臣飛飭愛

星阿關騰莫新等各處搜獲餘匪鄧世祿等三

十四名訊知張漢潮等商量欲到五耶誘我追

兵入山復思折回鎮安尋覓分出矛手由山商

仍下河南無如官兵追殺甚緊只得向棧道無

兵處所潛逃當將該犯等辦理隨督兵趕至華

陽二郿壩復被大河阻隔當卽鼓勵兵勇搭橋
搶渡途次聞慶成在草涼驛永保在廢邱關恒
瑞亦在三分驛均於棧道西面連絡紮營張漢
潮探知前後有兵竟從二里關向北直出棧道
沿山竄至盤屋屬之老峪口新口分兩路入山
東竄永保慶成卽帶兵追剿前進臣於沿途擒
獲探信賊匪訊知張漢潮又翻越秦嶺到五郿

山商量逃下河南再回湖北是以臣卽由大道

直赴商州迎頭截剿正可與慶成永保合擊兜

圍查張漢潮從前分出矛手五六百人尙在鎮

安山陽一帶滋擾前經臣奏派鎮臣長春帶領

山東新兵一千三百餘名就近剿辦尙未據稟

到打仗情形臣現在趕赴商州若張漢潮大股

賊衆未到之先能將分出矛手悉數殲除則張

逆竄至勢孤力薄更易剿辦惟是該匪詭譎多

端慣於捷走

臣

前奏以五郎鎮安山陽商州一

帶係賊匪必經之地均須派員分兵堵禦今官

兵未到之前賊匪業已折竄雖兵力不敷分撥

亦必得就現有之兵斟酌分派查陝甘補額新

兵一千五百名內河州兵五百名因本境有賊

一時未能前來延緩兵五百名現到漢中

臣

卽

派鎮臣木騰額都司朱廷舉將新到固原兵五百名帶赴漢中並將延綏兵五百名及收集各營留養病痊落後滿漢官兵總計可得一千六百餘名飭令帶領移駐五郎堵剿以專責成至鎮安山陽商州等處均關緊要尙未派員撥兵堵禦慶成現帶兵四千名以三千名追剿可騰出兵一千名派員堵剿下已飛咨永保將伊所

帶之兵合慶成所餘之兵就近籌商何路派何
員堵禦之處俟酌定咨覆到來再行彙奏

臣

一

面容倭什布吳熊先於邊防要隘實力堵禦

同日恒瑞奏言

臣

行抵鳳縣探知張漢潮賊匪

竄近棧道慶成永保已由草涼驛黃牛舖一帶

兜截

臣

查棧四之三方石舖楊家店等處係張

漢潮前次竄甘肅路此恐其復向西竄先令總兵

觀祥帶兵一千名馳赴大安驛一帶駐紮堵禦
藍號餘匪自不敢折回陝境臣帶兵趕赴廖家

灣以杜張漢潮西竄甘省之路該匪探知西北

俱有官兵復行東竄臣若向東尾追未免均在

賊後其所帶直隸陝西兵丁在甘兩月有餘雨

濕泥濘衣履等項均須整頓正擬赴漢中畧爲

製辦卽由城固洋縣一帶入山截剿張漢潮賊

匪途次接奉

諭旨令

臣

帶本管之兵速赴明亮一路協剿

臣

當將

兵丁衣履等項催令趕緊製備卽帶兵入山探

赴明亮軍營會同剿辦務期迅速蕝事均奏入

上命軍機大臣傳諭明亮曰張漢潮股匪入山東竄

明亮抄道馳往商州截擊昨有旨諭令慶成永保

專注此股與明亮併力合剿本日據恒瑞奏已由

城固洋縣山內趕赴明亮軍營是張漢潮一股前
此明亮尙可藉口一人獨辦今令恒瑞慶成永保
三人幫伊剿辦合力防堵聲威壯盛明亮等若能
趁此機會將張漢潮擒獲則在前迎截與在後追
擊者均屬有功朕必一體加之懋賞伊等斷不可
心存畛域互相猜忌致干疎縱之咎張逆一經就
獲其有名賊首均當一律殲除勿留餘孽卽投出

受撫之人必使按名俱有著落不令再生事端方
爲肅清陝境彼時明亮恒瑞慶成永保等公同熟
商察探何處賊匪緊要卽會齊兵力速向該處剿
辦或分或合或楚或川總在伊四人相機審度以
國事爲重彼此和衷一心剿賊朕亦不爲懸揣遙
制至摺內稱拏獲兩次賊匪俱供張漢潮欲逃往
河南再回湖北明亮等尤當於由陝入豫入楚要

路預籌截擊勿墮奸計爲一安

上又命軍機大臣傳諭恒瑞曰前因藍號白號均竄
南江已諭令勒保速派將弁帶兵前往剿辦恒瑞
自應遵照前旨速赴明亮一路專剿張漢潮一股
現在慶成永保自西而東與明亮併力合剿今恒
瑞由城固洋縣一帶前往探擊正可會同剿辦以
期迅速撲滅再昨據明亮等奏接到松筠知會張

瑛祥一股竄至徽縣兩當勢欲奔趨鳳縣此股賊
匪現又竄至何處因何並未奏及並著恒瑞查明
覆奏

同日倭什布奏言李樹等股匪由高子河竄及
豐溪勢將北擾縣治因聞有兵扼堵折向東面
廣龍灘一路前竄

臣

飛飭副將孫清云帶領弁

兵由郭家洲之北前進飭千總黃富國率領練

勇由郭家洲之東前進以便兩面兜截不使下
竄竹山又因孫清元等所帶兵力不充查前派
守備張懷毓帶往鄖縣策應兵五百各現在張
漢潮一股已西竄五郎一帶距鄖邑邊界漸遠
臣 卽將該守備原帶之兵調回飭令隨同孫清
元一路進擊並激勸城鄉紳士令其隨地招集
義勇互相守禦以助聲勢前月二十六七等日

該匪自廣龍灘擾及泉河有直趨郭家洲之勢
孫清元黃富國等直前攔截該匪聞風不敢前
竄分一股仍向廣龍灘繞出東南一路一股尙
在泉河等處屯擾其竄向東南一股經黃富國
跟蹤移堵二十九日在泉河之南白箕埡地方
迎遇賊匪該十總督領練勇紮駐要路鎗斃並
發該匪旋即折退至是夜四更時該匪復敢結

隊前來圍撲該千總營盤該千總率勇迎剿向
賊匪駢集處所施放連環擊斃執旗賊目一名
餘賊十餘名該匪不敢撲近天明該千總率勇
壓剿賊人敗退追殺四五里復斃賊二十餘名
該匪卽向來路折竄練勇亦有傷亡該千總現
仍隨賊所向前進截剿臣查兩股賊匪此時竄
擾處所總在泉河上下其勢欲向東北官渡一

帶肆竄雖經孫清元等兩路迎截惟所帶兵勇
不敷且該匪詭計甚多設將兵勇誘入山內復
繞道下竄益形棘手臣前調西面河兵勇經守

備王有帶回九里岡臣卽飭該守備扼要堵守

保護縣城臣卽日帶領原兵及已到廣西兵二

百名又抽調雲路溝關楊坪各卡防兵五百名

由東北一路兜截前進察探賊人趨向何路緊

要卽赴何路迎剿併督飭孫清元黃富國等分
投堵擊將該匪逼入南面深山漸逼漸進併力
圍剿至房縣邊隘卜三聘等股賊匪於二十七
日竄至年旺壁隘卡之西黃草坪地方窺伺經
副將樊雄楚叅將蔣觀濤等率領兵勇堵剿殲
斃賊匪數名該匪退回巫山屬之八石坪屯聚
臣嚴飭該副將等晝夜嚴防該處山勢陡險卡

隘嚴密可免闖入其平利境內藍家山八仙河

等處賊股尙在該處游奕臣復飭總兵路超吉

督率各卡弁兵加意嚴防再臣前奏被賊戕害

之湖南把總王萬岱該把總於二十三日在松

樹坪北山梁壓斃賊匪因首先下壓連被矛傷

滾落深崖當經叅將海麟尋覓該把總屍身未

獲呈報陣亡嗣復差弁於深崖箐林內尋獲該

把總身軀尙有氣息當卽昇出用藥灌救旋復
甦醒其所受矛石各傷雖重尙可冀其就痊現
經酌賞銀兩令其加緊調治

倭什布高杞又奏言查湖北鄖陽府屬各縣界
聯川陝兩省而施南宜昌二府所屬地方亦與
四川接壤自本境廓清以後川省賊股肆竄其
中有籍隸楚省之人每思奔突回楚是以於沿

邊各屬要隘分設營卡派令官兵集勇防守又
以邊界綿長兵勇不敷處處安設一遇有警更
須隨時調派往來迎堵每月所需兵勇鹽糧以
及轉輸軍火糧石臺站人夫水陸運脚等費爲
數既已不少而安撫者從歸籍民人酌給房費
口食等項亦應預爲籌備費用繁多除前撥餉
銀業已支用無存外又於藩司庫貯正雜各款

內先後借支銀六十六萬有零現在存貯銀兩
無多應請

旨敕下安嶽江西兩省撫臣或於庫貯銀兩內或於

關稅項下各撥銀五十萬兩就近解楚臣等因

目前軍需緊要一面奏

聞一面飛咨該兩省撫臣迅卽撥解以濟要需仍嚴
飭承辦各員加意撙節支用均奏入

上命軍機大臣傳諭倭什布曰倭什布由東北一路兜截賊匪并督飭將弁分投堵擊將賊匪逼入南面深山併力圍剿所辦甚是該督若能將徐添德李樹等擒獲其功甚大朕必加之懋賞或因該處現在兵力稍單未能兜圍痛剿亦當扼要堵截仍將賊匪逼歸川北亦可贖前此不能攔截之咎斷不可令其深入前已有旨飭諭勒保查明專剿徐

添德等股將弁令其各帶原有之兵赴楚協剿想亦卽日可到倭什布更當爲兩面夾攻之計以期迅就殲除其退回巫山之下三聘等股及在平利境內游奕之賊該督務當分飭鎮將等加意嚴防毋得稍有疎懈把總王萬岱旣可調治著賞給千總若因傷重身故卽咨部照千總陣亡例議卹

上又命軍機大臣傳諭安徽巡撫陳用敷江西巡撫

張誠基曰據倭什布等奏防邊經費不敷請撥安
徽江西兩省餉銀各五十萬兩解楚備用著陳用
敷張誠基先於該二省關稅項下儘數動撥如有
不敷再於藩庫存貯銀兩內添撥各五十萬兩派
委委員解赴楚北以資接濟

十五日

辛未

明亮與肇慶成永保奏言

臣

明亮興

肇督率鎮將馳赴東路截剿途間適與

臣

慶成

永保迎見並探知賊匪由子午峪入山晝夜狂奔已從老林翻過秦嶺其地處處可通臣等公

同籌酌此吸賊匪詭計百出盤旋山內爲日已

久分合靡常道路最爲熟習臣等若合兵自北

而南入山剿辦盡成尾追旣不能迎頭攔截且

恐日久徒疲兵力必須分兵兜截應機迎剿臣

明亮與肇仍卽日馳赴商州該處山徑情形臣

明亮尙爲熟悉卽由東北抄截而至西南以扼賊匪東竄豫省之路

臣

慶成永保甫自西路截

剿而來賊匪出沒處所稍知梗概卽帶兵從西路峪口進山由西北而至東南以扼賊匪西竄棧道之路又另派兵丁二千餘名交富成等帶領緊躡賊匪以防折回北竄又可杜其逗遛掠食而五郎境內更爲賊匪往來必由之路

臣明

亮先已奏派延綏等營兵一千六百名令總兵
木騰額帶領以爲聲援控制此時賊匪所恃者
善於聞風躲避卽如山陽一帶尙有分出賊夥
牽綴官兵今臣等三路兵力相等雖賊情早晚
無定官兵亦卽可移步換形較之往返札商更
得實濟

慶成又奏言臣此次仰蒙

聖恩帶兵赴陝協剿查漢江以北張漢潮一股竄匪
游奕已久尙未殲除已於途次具奏並應厚集
兵力合剿迨因藍白兩號竄匪經恒瑞等自甘
省截剿折回逼近棧道適張漢潮西竄相離不
遠若使陝省之賊復與甘境折回之賊合夥匪
黨益增現就各路帶兵大員而論明亮處尙有
將軍興肇總兵長春關騰木騰額愛星阿等數

員恒瑞處亦有總兵觀祥凝德二員永保處僅
副都統銜綸布春一員而各路所帶新陳弁兵
永保係收拾傷病落後之兵恒瑞仍領原兵明
亮於原帶兵外現添山東陝甘補額之兵惟是
棧道爲兩路竄匪必經之區似較別路緊急永
保兵力稍單臣是以前往策應協剿且逆計張
漢潮之賊狂奔必速明亮從後緊躡而來即可

與之先行合擊此臣入陝後相度緩急帶兵協
剿之實情並非預存成見不願與明亮合剿也
均奏入

上命軍機大臣傳諭明亮慶成永保曰明亮等奏會
籌分投截剿情形布置雖是但明亮前奏通盤籌
畫一摺原欲分投堵剿四面合圍乃祇以一奏了
事並未將賊匪截住此番布置又恐成虛卽明亮

自稱熟諳山徑然則何以屢爲賊欺終竟落後耶
且閱摺內稱賊情詭譎善於聞風逃避明係預留
地步竟成軍營摺奏套語三年以來屢觀實厭矣
何能揆勝算以期必克耶明亮及慶成永保所帶
之兵不爲不多總緣調度不能合宜見賊不能勇
往用兵無人兵多仍屬無益卽如近年來各路帶
兵大員老師糜餉何曾與賊接仗賊至而兵未來

皇朝通志卷一百一十一
三
兵至而賊已遠遁隨賊奔馳不過徒耗兵力耳現
在已交秋令若僅紙上談兵仍前怠玩遷延月日
朕惟有泣告

几筵明申國法伊等至彼時縱知悔懼噬臍莫及又據
慶成覆奏論旨一摺祇係空言塞責若奮勉成功
朕必加之恩賚如再存猜忌比周之意國家憲典
具在斷不能屈法保全至永保從前在鍾祥縱賊

竄逸以致由豫入陝蔓延至今其咎本無可辭經
朕逾格矜全棄瑕錄用且使之帶兵自効永保稍
有人心惟當激發天良認真剿賊以贖前愆總之
明亮慶成永保已三面會商分路截剿若於此次
商辦之後不論何路將張漢潮擒獲凡在前迎擊
在後追剿者厥功相等朕必一體施恩若何處堵
截不嚴縱賊他竄卽惟此一路帶兵之人是問責

有攸歸不能曲加寬宥矣

欽定剿平三省邪匪方畧正編卷一百十 己未年

七月十六日

壬申

吳熊光奏言張漢潮一股賊匪

自五月杪經豫省官兵擊退西竄後月餘以來

其大股竄往陝西之五郎洋縣等處尙有兩小

股仍在山陽商州一帶游奕

臣

一面督飭鎮將

於邊界嚴密防堵一面差探該逆大股奔赴棧

道見有官兵截剿卽與楚匪李全合股折回由

陝省長安屬之子午鎮入山向東奔竄並聞明
亮慶成卽帶兵趕赴商州截剿臣恐差探未必

確實惟念張漢潮欲假道豫境竄回襄陽原籍

前此獲賊僉供如一足該犯蓄謀已久不可不

豫爲戒備明亮慶成等旣帶兵繞赴賊前截剿

諒不至再有東竄滋蔓然商雒一帶與豫邊接

壤山徑紛歧又係該匪竄走熟路臣惟有會同

鎮臣張文奇田禾桐督率將弁於各緊要隘口
加意巡防不使闖入再探得楚北有賊匪數千
人分路竄擾直撲竹谿縣南之西溝卡隘經倭
什布分派官兵截擊賊匪卽奔回四川界內其
鄖陽一帶前經倭什布知會已派守備張懷毓
帶兵五百名在彼駐守且現當江水盛漲之時
自可無虞賊匪偷渡再臣欽奉

諭旨令於晉兵過豫時妥爲應付照料臣遵卽轉行

藩臬兩司飛飭沿途經過地方官豫備車馬供

頓並派委文武大員沿途照料催趲俾免遲悞

奏入

上命軍機大臣傳諭吳熊光曰賊首張漢潮籍隸襄陽總思竄回本籍吳熊光於陝豫接壤山徑紛歧之處會同兩鎮分撥將弁擇要嚴防所慮尙是自

應如此辦理惟據稱張漢潮奔赴棧道見有官兵
卽與楚匪李全合夥折回等語李全一犯節次據
明亮等奏報從未有與張漢潮合夥之語此次吳
熊光係差弁探報或因得自傳聞未爲確實至賊
股內向有李樹李述李全等犯之名是否卽係一
人著留心查明遇便具奏再摺內稱楚北賊匪竄
擾竹谿縣南一帶經官兵截擊賊匪卽奔回四川

界內等語若果如吳熊光所奏固屬甚願第恐所
奏未必確實此次吳熊光奏報係由四百里拜發
如果楚北賊匪有折回川界之事倭什布應由六
百里馳遞早達朕前必不在豫省探報之後也

十七日

癸酉

吳熊光奏言月來

臣

專差赴陝察探

並據陝西州縣稟報附近棧道一帶止有張映
祥藍白二號賊匪從未聞有李全在陝竄擾之

語是以臣前摺內以所探合夥之說恐未確實

茲又據探報陝省賊匪張映祥一股竄入藍門

鎮距郿縣十五里張漢潮小股竄至藍田屬之

油磨地方自係張映祥與李全本係合夥李全

原係楚匪現又與張漢潮合夥東竄希圖假道

豫境逃回湖北原籍上次探報似非無因雖昨

據明亮知會已帶兵趕赴商州東面有兵攔截

第思該匪等詭詐異常形跡飄忽豫省盧浙一帶與商雒毗連皆係崇山峻嶺而該匪等翻山越嶺更屬長技今兩股均向東趨豫省邊界必須重兵防禦現在南北兩鎮僅有兵四千餘名盧浙西面沿山六百餘里卡隘林立若復分撥必致顧此失彼臣再四思維不得不就現有兵力專心在西面防堵本日准倭什布來咨川省

賊匪李淑宋燧子等分路肆擾已闌入竹谿之高子河一帶該匪皆籍隸襄陽俱思竄回原籍此時雖江水盛漲賊難偷渡但亦不可不豫爲

戒備

臣

已札飭南汝光道陳鍾琛前赴襄江北

岸之湖北光穀等處督同南陽府就近將江干船筏飭令由北岸行走夜間提泊北岸以免賊匪搶渡並調集鄉勇嚴密防守然鄉勇一項不

諳紀律究不足恃茲蒙

諭旨於昨調山西兵三千外又調添盛京兵二千名
令將添調大兵之處沿途廣爲傳播如賊敢窺
伺河南邊界卽於此項兵丁過境時酌量截留
一二千以資堵剿之用惟是臣前面詢在豫協
防之山西都司永保等據稱晉省南北兩鎮南
鎮之兵經調派出征外存營有限兼有蒲郡防

守未能抽調而北鎮兵丁地處關外由大同行抵河南省南地方總在一月內外

盛京官兵到豫更需時日未免緩不濟急因思安徽之壽春鎮臣王集現在帶兵駐劄於豫省之固始縣交界二道河由間道行走距南陽僅七
百餘里可以剋期而至可否仰懇

皇上勅知該鎮帶兵暫赴湖北樊城上下一帶駐劄

則豫省地方既可兼顧而賊亦不敢再行東竄
俟奉到

諭旨

臣

卽飛咨倭什布查照或二竹一帶賊匪業經

官兵擊退壽春地方亦關緊要並可就近飛咨

王集停止前進

臣

現在僅帶駐防滿兵二百名

暫駐盧氏察探何路緊急卽赴何路董率防堵

如賊已折回川陝豫省無須兵力所有新調五

千官兵自應全數令赴楚陝堵剿不敢拘泥截
留

同日倭什布奏言臣探聞李淑等股匪屯聚官

渡兩河口等處該處爲竹谿竹山房縣三屬交
界之所路徑紛雜臣與孫清元黃富國三路兜

圍前進賊匪翻山越嶺向南狂奔逸入房縣之
漳落河一帶臣查房縣之東卽係保康縣境南

通宜昌北達襄陽東與荆門所屬之遠安縣毗連俱爲賊匪歷次竄擾舊路設被東入保康則襄宜各郡又復爲之震動所關甚重

臣

隨統率

官兵不分兩夜繞由竹山縣倍道前進抄赴賊

前迎截並令孫清元黃富國帶領兵勇各取捷

徑跟蹤堵截以杜旁竄臣於初七日馳抵房

縣之黃龍峯適賊匪奔竄而來當卽督率官兵

截擊其時孫清元黃寧固亦各帶兵分爲兩翼抄截而至賊卽折回西南之獅子巖屯聚時已昏夜隨於黃龍堰紮營堵守詎賊匪於是夜四更直撲孫清元營卡官兵施放鎗礮斃賊十餘名賊匪愈集愈多遂將孫清元營盤四面密圍

臣隨派撥官兵飛赴應援鎗斃賊匪二十餘名

賊始退去次早探聞賊衆已向北遁欲由汪家

河花菓園一帶直趨襄陽之均州穀城等處

臣

當卽派撥守備張懷毓帶兵繞赴汪家河據險

堵截

臣

仍駐劄黃龍堰以遏其東竄之路賊知

東北二路有備復折回獅子巖

臣

以賊情詭譎

且知我營兵力單薄必有乘夜劫營之事當令

黃富國帶領練勇在

臣

營左右山溝內埋伏

臣

親率兵勇整備鎗礮齊集營卡徹夜防範至三

更時分賊果蜂擁而來圍撲臣營官兵鎗礮齊

發斃賊二十餘名黃富國帶領鄉勇由山溝突

出左右截擊殺賊四十餘名賊匪漸退臣復派

撥官兵協同黃富國兩路追擊沿途又斃賊三

十餘名賊隊退入山溝密箐之中其時天尙未

明恐有設伏當將兵勇撤回次早撥派兵勇向

獅子巖進剿賊已率領大隊由羊叉河向西南

奔竄似有折回川省之勢惟賊匪詭計百出或
引誘我兵盡赴西南以便折而向東亦未可定
且據竹山縣稟報李淑後股賊匪尙屯泉河一
帶并據竹谿縣稟報羅半年一股亦由李淑等
竄入之西溝接踵入楚現於竹谿之石板河峯
谿小紅銅山等處分屯滋擾臣查前後數股賊
匪人數不下二萬臣所帶之兵僅止千餘卽孫

清元黃窩國所帶兵勇亦各不滿一千各處邊
卡官兵雖尙有數千第邊界綿長處處俱有賊
匪窺伺如大寧之卜三聘龔建等股尙在房縣
年旺壁巴東界嶺等處往來遊奕不時乘間撲
卡其竹谿西界以外平利境內之金雞河亦有
大股賊匪屯聚出沒無定是此時邊卡官兵斷
不便遽撤此外又無可調之兵臣思總兵路超

吉駐守梓桐埡距竹谿縣城僅止百里尙可兼
顧已飛札該鎮將防堵事宜暫交叅將海齡遊
擊姚國棟督率妥辦卽酌抽官兵數百名前赴
竹谿督同守備王有防護城池仍察探羅逆等
趨向相機截擊如西界有警卽可就近策應一
面飭令竹山竹谿等縣各集義勇實力堵禦並
卽飛咨勒保速派官兵來楚協剿臣惟有親率

將弁竭力堵剿斷不敢等侯川兵坐悞機宜再
此次打仗陣亡把總熊作梅一員兵勇亦間有
傷亡容查明咨部均奏入

上命軍機大臣傳諭吳熊光倭什布曰張映祥張漢
潮兩股賊匪雖均東趨有明亮恒瑞永保等分投
截剿似可無虞已節次降旨令其認真剿辦而川
省李淑宋履子等分路闖入竹谿倭什布現在督

率鎮將悉力堵禦究恐賊衆兵單是以添調山西
兵三千名往楚協剿一到豫境該撫務須催令迅
速行走趕赴倭什布軍營不可稍有遲延以目前
賊勢而論楚省甚爲緊要晉兵過境吳熊光不可
拘泥前旨截留一二千在彼坐守以致虛糜豫省
廩給楚省多添兵力於豫省更爲有益若倭什布
能將李淑等股賊匪乘勢殲滅或仍逼回川境則

賊匪離楚已遠而豫省更臻寧謐是爲楚正所以
爲豫也至吳熊光預飭道府令將襄江船筏俱在
北岸行走停泊自應如此辦理摺內又稱王集現
駐二道河距楚甚近令其帶兵暫赴樊城一帶駐
札似屬可行若李淑等仍回川東不必又添安徽
之兵並著該撫酌量辦理若竹山竹谿賊匪擊退
後卽令該鎮仍回本處可也

上又命軍機大臣傳諭明亮曰勒保自任經畧以來
已及半載於剿辦賊匪機宜總未通盤籌畫惟知
安坐達州毫無調度僅將各路軍營所報情形敷
衍入奏前據倭什布奏川省賊匪李淑李添德等
由大寧西溝闖入楚省竹谿邊界係前月二十四
日拜發至今已二十餘日並未據勒保奏及此事
茲又據倭什布奏李淑等股賊匪屯聚竹山竹谿

房縣交界處所倭什布督率將弁悉力堵禦賊匪
竟敢直撲副將孫清元營盤四面密圍意欲北趨
襄陽均州穀城一帶經倭什布派兵堵截賊匪又
復折回乘夜圍撲倭什布所駐營盤被官兵擊退
始向西南奔竄似有折回川省之勢而李淑後股
賊匪尙屯泉河一帶又有羅半年一股亦由李淑
等竄入之西溝接踵入楚爲數不下二萬等語此

次楚境滋擾之賊如果在楚省竊發事起倉猝勒保或可諉爲未經得信今李淑徐添德等股賊匪俱係由川省大寧闖入楚境現經倭什布飛咨勒保速派官兵赴楚協剿可見楚省並無川省派往之兵勒保於事先旣未能預爲防範縱令羣賊擾及楚境迨賊已入楚又不星速派兵前往會擊並未將如何籌辦派何人前往會剿之處先行馳奏

竟置楚省之賊於不問又安用此經畧爲耶且現
在藍號白號賊匪俱已竄入川北地界亦未聞勒
保派兵堵截是勒保竟係擇一無賊處所紮營株
守直與木偶無異不料勒保辜負委任一至於此
前因官軍剿捕日久恐致疲乏節經詢問勒保應
否添調官兵而勒保以無庸添兵覆奏復經降旨
詳悉開導諭以不可迴護前奏並不可存惜費之

見致悞事機勒保仍堅持前說不必添兵朕早料其不足倚仗已預調山西兵三千盛京兵二千前往接濟今楚省之賊多至二萬而倭什布一路官兵不過三千有餘則勒保節次所奏不必添兵之說是誠何心豈不欲逆賊速平耶朕所以用勒保爲經畧者因其辦理黔省犵苗尙爲出力仰蒙考疊次加恩晉封公爵朕親政之初以勒保受

皇考厚恩必能感激圖報是以特加委用畀以經畧事
權並令伊弟永保敬將

皇考大漸時盼望平賊之意詳悉諭知勒保稍有人心
宜何如感極思奮乃任事以後並未聞稍有布置
駐營達州老師糜餉全不知經畧爲何事現在楚
境賊匪如此肆擾勒保置若罔聞竟同聾聵設賊
匪圍撲倭計布營無益或有意外之事則國體所繫

朕必將勒保卽於軍營正法今倭什布一路已漸
擊退賊衆而勒保種種玩愒上負

皇考及朕簡用之恩此而不加懲治軍紀安在勒保者
革職孛問所有經手各事務著明亮接辦並授爲正
紅旗漢軍都統其四川總督員缺著魁倫署理並
派乾清門侍衛春福安福色玉慎傳陞一同馳驛
前赴明亮軍營著魁倫親賚此旨前往宣讀計此

旨到時張漢潮一股當已辦竣若未竣事明亮接
奉此旨將剿辦張漢潮一股事務交付慶成永保
卽酌帶兵力同魁倫等前赴達州軍營傳旨將勒
保革職拏問卽將以上指出各情節嚴詢勒保一
面會銜定擬具奏將勒保交與魁倫監禁俟旨明
亮同額勒登保侍衛春寧等馳赴楚省竹山竹谿
一帶剿辦李淑等股匪其川省境內之賊等交魁

倫督辦慶成侯陝省剿賊事竣卽前赴川省同魁
倫協力會剿並著明亮魁倫查明由大寧闌入楚
境之李淑各股賊匪本係何人追剿何以並不上
緊趕截縱令入楚一經查實卽將此一路帶兵之
員一面革職拏問一面奏聞不可稍有瞻徇朕此
次用明亮爲經畧亦並非滿意者明亮剿辦張漢
潮一股賊匪遷延日久至今尙未辦竣遲悞之咎

實所難辭特因其經歷行陣前此平定金川時伊
卽係副將軍且辦理苗匪係伊同額勒登保帶兵
歲事若論剿賊出力三年以來始終奮勉者惟額
勒登保一人但伊不識漢字此外實不得其人是
以加恩令明亮前往接辦明亮不可遽存自滿之
見惟當以勒保爲戒知感知懼勉力圖功先將楚
省大股賊匪上緊剿竣其善後事宜交與倭什布

辦理再將川陝境內竄匪悉數蕩平朕必特加懋賞若仍事因循不加振作則其罪更浮於勒保矣至現在添調之山西官兵已降旨催令前赴明亮軍營其盛京所調之兵尙需時日明亮到楚後如兵力尙覺不敷卽將雲貴之兵一面檄調或此外尙有須添兵布置之處總當細心籌畫務令壁壘一新士氣百倍迅掃賊氛勉之慎之

十九日^{乙亥}勒保奏言旬日以來額勒登保自巴

州之鎮龍關追剿王登廷一股至渠縣境內沿途時有斬獲二十六日該匪等正欲由林壩溪涉淺過河適阿哈保安祿穆克登布等前隊馬兵追及截殺賊匪六十餘名淹斃一百餘名賊衆卽旁竄大竹之卷硎門由大安漕直向鄰水境內晝夜狂奔本月初一日五更時值大雨額

勒登保因賊蹤不遠乘兩出奇趕剿隨分兵兩路進發至石隴寨趕上賊匪兩面夾擊該匪等竄踞五百梯山梁率衆抗拒我兵鼓勇競上殺賊四五十人賊卽拋棄旗礮翻山潰遁額勒登保又督兵冒雨追殺十餘里斃賊二百餘人生擒男婦一百三十五名口內有從逆日久之周思順等六十三名卽行正法餘皆被脅訊明釋

放現由長壽之葛蘭橋一路追剿前進至德楞
泰由開縣之溫湯井一路追躡張添倫辛聰等
股至大寧縣境於六月十九日在沙陀子地方
追上張添倫賊衆殲獲八十九人餘向老林奔
竄因辛聰顏中考折回後路遊奕復移師至毛
壩截擊詎該匪等探知官兵轉來又向小水田
奔逸二十五日至馬槽壩趕上辛聰賊尾殲斃

三十餘名生擒段維青等十四名我兵連日追躡二十八日在雲陽之瓦屋嘴地方忽遇一股賊匪有四五百人由南溪橫道衝出德楞泰卽督同賽冲阿溫春等分兵三面兜擊賊匪始猶抗拒繼見我兵層層圍逼均卽四散奔逃我兵乘勢掩殺當斃賊匪一百五六十名生擒張起新等三十三名訊知此股係包正洪之弟包三

自包正洪鎗斃後卽隨同林亮身之姪孫林添
祥帶領敗殘夥黨五百六十餘人竄出欲往大
寧與樊人傑徐添德等合夥因被朱射斗分兵
追截不能竄去旋又折回德楞泰卽分兵搜捕
朱射斗亦於是晚趕到復於二十九初一等日
在箭頭溪吉慶寨等處搜獲活賊一百七十七
名逆犯林添祥假充難民欲圖漏網經吉慶寨

鄉約蔣朝貴認出一併拏獲訊知該犯自林亮
功被殺後伊卽自稱元帥與包正洪一路搶掠
昨因包正洪鎗斃包三本不管事卽隨林添祥
率衆同竄此次在瓦屋嘴遇兵剿散各自奔逃
包三尙無下落德榜泰一面委員將林添祥解
赴臣營一面暫留朱射斗在後搜捕隨統領全
隊官兵由奉節一路追賊前進臣查包正洪三

股殲獲殆盡現在大寧奉節之賊均向巫山東
竄欲圖闖入楚疆節據七十五稟報因界嶺巴
霧河一帶臣派令總兵德英額副將呂朝龍
在彼防堵近又添派廣東新兵九百餘名協防
現在張添倫辛聰徐添德樊人傑龔建卜三聘
等股均竄聚巫大交界之大昌及大寧鹽廠附
近之老山林內潛匿臣已飛飭德標秦朱射斗

由大昌寶塔兩路進兵恐該匪等因巴巫一帶

防守嚴密又向平利奔竄臣復嚴飭慶澗會同

道員溫承惠多帶兵勇於平利各要隘實力堵

截其巴東一路臣已嚴飭將軍成德總兵王凱

於各要隘嚴密防堵毋稍疎懈再白驢場開甲

等一股先從廣元屬之神宣驛折入後山曾家

河一帶經臣飛飭由陝追來之遊擊楊國林等

約會派防廣元之遊擊沈漢玉相機夾擊嗣據稟報該匪等竄赴南江恐梟國林兵力稍單臣又派令總兵德齡副將褚大榮等帶領兵勇三千餘名馳往剿捕但藍號一股昨由甘境竄入廣元尙在白陽站地方遊奕廣厚吉蘭泰自應遵

旨留甘防守而恒瑞與索費英阿之兵節經檄令

赴川跟蹤追剿昨准恒瑞咨會已奏明回至鳳
縣欲就近會同明亮等剿辦張漢潮一股自應
趁張逆窮蹙之時盡力窮追臣已飛催恒瑞索

費英阿迅速前來一手剿辦並咨會明亮等如
能日內將張漢潮辦完卽留永保搜捕餘匪防
守陝境邊隘明亮慶成應分兵兩路一由廣元
一由西鄉分路進兵以期將藍白等號之賊尅

期辦竣

勒保又奏言查川省賊匪其始惟王三棟爲白號徐添德爲青號羅其清冉文倚爲藍號迨後楚陝各匪齊王氏姚之富高均德王光祖樊人傑張添倫等竄入又有黃號老藍號月藍號小白號月白號線字號之稱近聞甘省折回之藍號內又分出數百人稱爲黑號該匪等或一股

爲一號或數股同一號或分股另爲一號並有
此號又改爲彼號者總係舊有之賊各自立號
爲記實非著名首逆之外又復新添黃號藍號
等項賊匪且首逆名下無不各有賊目卽如現

奉

諭旨垂詢之譙城等十名查譙城係名譙城與方文
祥王希子綱皆係丹添元鮮大川縣內之人現

俱同在一處嚴中考卽顏中考張紀則與辛聰
同夥雷思榜則與張子聰同夥維半年則與李
淑同夥李淑卽係李全至李光輔乃王光祖之
頭目自王光祖死後卽自稱爲首均非新添之
賊亦非另分之股以_臣所知如譙城等隨同首
逆而稱爲頭目者各股中不可枚舉從前各號
賊衆本有萬人或數千人自頒發脅從罔治之

思有解散實多目下每號所存多不過四五千至千
餘人及數百人不等蓋因被擄之人均知投出
旋擄旋散卽久在賊中之人亦俱隨同散出惟
真正教匪尙不肯出投現在夔州一路竟有同
時散出千餘人並數百人者且經官兵疊次殲
戮亦俱共見共聞在福寧則謂有增無減在
實可信其有減無增前奉

臣

論旨飭臣籌議添兵臣因事關重大曾與福寧面商

伊始言何不趁此添兵追臣將籌兵命將以及

添餉種種爲難之處通盤計議伊亦深以爲然

且臣自正月間即將各股首逆姓名詳晰具奏

並未稍存粉飾之見實因軍行

國計均當處處經籌通謀全局是以定見不請添

兵儘力辦理至臣自前年十二月到川至今據

糧員稟報共用過銀二百四十三萬有奇因

臣

從前統兵剿賊之時各路官兵如惠齡富成七

十五觀成並鎮將等分路帶兵者凡有應領軍

餉等項大半俱由

臣

處隨營總理糧員支放卽

額勒登保亦於

臣

營領過銀十六萬二千兩並

隨營及後路臺站州縣隨時分領運腳採買米

石等項欸項雖屬繁多出入均有文領簿籍可

稽無難徹底清查也至景安現在奉

旨回京應懇

聖恩另派大臣一員來川會同福寧辦理糧餉

勒保又奏言查川省幅幘遼濶川東川北各屬

跬步皆山臣上年週歷各處曾經疊飭地方官

激勸百姓據險紮寨團聚而居並酌定規條令

其互相守禦選擇公正矜耆設立寨長團長董

率稽查官爲酌給火藥器械以備捍衛近來各
股賊匪奔竄每遇官兵追剿之時各團寨鄉勇
並能協同截擊多有斬獲沿邊路徑挖斷者雖
多然道路紛岐處處可以通達勢不能一律創
挖茲蒙

聖明垂詢

臣

復飭各地方官相度地勢仿照遵行如

有不能挖斷路徑卽於各寨團勇內挑派勇敢

能事者或數十人或數百人擇險添設卡隘實
力巡防一體給與鹽糧以示鼓勵庶幾聲勢聯
絡賊至則到處藉以阻撓一經官兵追及即可
痛加殲洗於剿捕實屬有裨並已通行川楚陝
甘等省均令因地制宜一律辦理

同日勒保福寧奏言_臣等前蒙發銀二百五十

萬兩已先後運解到川緣軍務重大積欠已多

祇提出賑卹銀五十萬兩其餘二百萬兩卽分撥成都達州保寧三局找發四五兩月各路舊欠並六月內應支欸項之外存貯無幾伏查軍需動支銀兩若祇以征防兵勇之鹽糧分例計算本局無多而各軍營並後路臺站州縣所需夫驟連脚以及製辦軍裝軍火等項在在需銀支發司庫應存正雜各欸早經墊用無存本省

應征地丁蒙

恩蠲免過半關稅鹽課又收不足額而各標營歷次
招募新兵每年轉添餉銀三十餘萬因此人不
敷出凡司庫應發兵餉廉俸及臺藏等費現俱
在軍需銀內通融辦理需用之大並不專在軍
營以刻下各局現貯餉銀約畧計算祇敷四五
十日之用且各屬倉穀因動碾軍糧所存無幾

現據藩司林僊詳請於秋收後亟須採買二百萬石以裕軍儲又賑卹案內五十萬兩除提出十萬兩爲賊隊中散出難民居食之資外儘此四十萬兩發給極貧難民兩月口糧尙屬不敷臣等再四商酌目前奏請動撥計算自京解運須於秋杪方得到川八九兩月已有不能接濟之勢亟須預爲籌計惟有仰懇

聖慈勅部動撥軍需銀三百萬兩賑濟採買兩項銀

二百萬兩迅速解川庶於軍需地方均有裨益

再各局存項無多此次若俟新餉到來究恐緩

不濟急因思山西省現當地丁奏銷之際必有

存銀臣勒保擬卽於該省借撥銀四五十萬兩

先行解川接濟俟京餉過境時截留撥還臣爲

軍需緊要一面咨明山西撫臣伯麟卽委員撥

解前來以資應用又查部撥餉銀有以一千二
鞘裝貯者到營甚速有以三千一匣裝貯者則
每多遲滯蓋緣直隸山西一帶均可用車載運
而一入陝西棧道山路崎嶇夫驟挽運維艱應
請

勅下部臣此次卽於在京發兌時均以一千兩裝貯
一匣以期迅速運到

勒保又奏言數月以來各路軍營所出武職各
缺有准部咨指交臣處揀補者有由領兵各員
具報開缺者當此軍務用人之際員缺未便久
懸並據陝甘川楚等省各路帶兵大員將出力
將備員弁開具功績保送前來臣逐一秉公察
核就其勞績最著應行分別請陞請調請補之
處彙開清單恭呈

御覽合無仰懇

聖慈俞允實於各路軍營有裨均奏入

上命軍機大臣傳諭明亮魁倫曰朕閱勒保奏川省
各路官兵剿賊情形額勒登保在大竹鄰水境內
冒雨進兵出奇制勝德楞泰在開縣大寧境內往
來截剿乘勢掩擊皆係此兩路官兵奮勇出力並
非由勒保指示調度始獲勝仗至朱射斗一路前

在小毛坪鎗斃首逆包正洪此次打仗復威除餘
黨亦係該鎮之功與勒保無涉今勒保摺內敘述
功績意欲攘爲已有將誰欺耶現在大寧等處賊
匪李淑徐添德已竄過竹谿之西溝竹山之張公
橋復至泉河黃龍堰滋擾圍撲倭什布營盤又有
羅半年一股亦由西溝闖入楚境早據倭什布節
次奏報乃勒保摺內尙稱大寧奉節之賊欲圖竄

入楚疆全不知賊蹤至楚之事可見勒保安坐達
州於各路賊情惟據谷稟轉奏楚省咨會未到伊
卽惛然安能望其相度機宜預行調度目下自楚
至川道路爲賊梗塞文報或致不通勒保亦當多
遣謀事之人分投訶探似此一味顛預毫無聞見
與警警何異所有前此入楚各股賊匪不知是川
省何兵追躡曾經降旨詢問今閱勒保摺始有七

十五德英額呂朝龍二人并派廣東兵九百名在
交界堵截之語此節最關緊要若係勒保派往時
卽諭令及境而止不必入楚則是勒保惟知有川
不知有楚經畧之謂何若七十五等三人畏賊退
怯竟以翻入老林誑報經畧則伊三人之罪更不
可追勒保曾否諭令三人入楚協剿亦須明白訊
問速行據實具奏勒保於賊匪肆竄情形並未偵

探明確僅據七十五等捏稟之詞謂賊尙在大寧
附近老山林內藏匿所言幾同夢囈且賊於川楚
界上到處奔竄往來自如勒保轉以賊匪屯聚我
兵獲勝爲詞覘顏陳奏可謂無恥之極至白號楊
開甲一股竄至南江勒保派令遊擊尤漢玉與陝
兵夾擊又派總兵德齡等帶領兵勇馳往剿捕藍
號一股已飛催恒瑞索費英阿等迅速前來剿辦

所籌尙安自應如此辦理其另摺覆奏賊匪各色
稱號賊黨忽分忽合各立號記原無一定而何賊
與何股合夥現竄何地勒保未能深知所查多未
確實在勒保之意總欲迴護從前不肯添兵之奏
故以賊匪股數無多藉詞支飾此猶係勒保捏奏
小節至賊匪有減無增一語實屬有心欺罔試思
各股逆匪蔓延數省陝省之平利楚省之竹山竹

谿房縣到處被賊蹂躪裏脅自多據倭什布奏入
楚之賊已有二萬人勒保身為經畧各路皆係管
轄豈得以川匪竄入楚陝卽謂有減無增耶勒保
以此狡詞迴護實屬喪心病狂最重之罪實在於
此現已派魁倫馳驛赴川署理督篆明亮應將此
一節會同魁倫向勒保嚴切詢問迅速奏聞又據
勒保奏請撥餉銀五百萬兩所奏尤屬荒唐前發

去餉銀二百五十萬兩甫經到彼廣興尙未抵京
豈一時已全數用去勒保輒以積欠已多墊還舊
欠爲詞又復請餉五百萬兩全不籌及國計祇圖
請發多金以爲虛糜侵冒地步勒保之意亦自知
所請過多故另立賑濟難民名色巧爲朦混蓋軍
需支用有一定則例部中可以按例議駁卽尋常
賑濟尙有預報戶口冊籍可據若投出難民之數

任開數萬數十萬名無從核其多寡是勒保竟欲藉賑濟名色爲將來冒銷之計更屬有心取巧或係從前軍營各員因有餽送和珅銀兩勒保福寧等亦有自行侵用之項將來無可開銷借此彌補亦未可定朕素不靳惜帑項曾經降旨以軍營支發兵丁欸項總當畧爲寬裕倘成功迅速朕必有例外准銷恩旨卽投出難民亦須優加撫卹務使

按名俱有歸著毋令一夫失所原爲體恤兵民起見豈可令帶兵之員各肥囊橐乎並著明亮魁倫一體據實嚴查具奏再勒保已咨伯麟於山西地丁內借撥銀五十萬兩先行解川計此項到時尙可接濟目前若實有不敷著明亮魁倫查核情形必需若干萬兩據實奏請以便卽行撥往明亮接奉此旨俟魁倫到後再到勒保軍營會同查問又

勒保保奏各員聞大半係親隨之人未必公允著
將奏摺清單一併發交明亮閱看務須逐一秉公
查核如所保各員內核其功績實係奮勉出力堪
膺保薦之員卽照勒保開單奏請陞補倘有徇情
濫保者亦卽據實參奏毋稍瞻徇

同日勒保又奏言

臣 欽奉

諭旨令

臣

查景安在湖廣任內如何避賊情形遵卽

專差赴楚密調廣福來營與景安質對茲廣福

於七月初一日到營臣傳齊景安廣福當面質

對景安於嘉慶三年三月間由河南赴湖廣總

督新任帶同候補副將汝寧營叅將廣福領兵

至荆門州白雲山地方劄營卽委廣福總理營

務適張漢潮股匪竄至是月二十八日派令廣

福並叅將董寧川帶兵分路探賊廣福一路由

東北探遇賊匪追捕頗有斬獲廣福見該處賊
匪無多差人稟請發兵五百名截剿景安以董
寧川回報東南一帶賊勢較衆恐廣福冒昧輕
進隨卽傳令撤回是夜廣福前營因附近之糧
臺鄉勇營內放鎗廣福黑夜莫辨亦卽施放鎗
礮次日景安加以訓飭並未深究嗣景安駐劄
竹谿每接稟報不察虛實率行發兵及至中途

又復撤回以致衆兵多有訾議廣福亦常面爲
稟阻因此景女心懷愠怒十一月間聞有賊匪
欲由陝竄禁汝廣福帶兵前赴鄖西截堵景安
欲藉此申飭使之畏懼二十日傳齊地方文武
並闔營將弁將三月間黑夜亂放鎗砲之事面
加呵斥並欲柳責廣福不服剖辯景安卽加置
詞以致廣福心懷不甘亦卽出言頂撞經各官

勸阻而止二十二日仍札委廣福前赴鄖西繼
復改派鄖陽防堵去後景安氣忿莫釋隨以玩
視機務肆行咆哮等情將廣福叅奏請

旨枷責示衆俟軍務告竣發往伊犁充當苦差

臣復

詰以景安如何每日移營避賊廣福如何稟阻
以致觸怒據廣福堅稱景安在竹谿駐劄數日
並未移營惟聞賊信卽欲發兵廣福以偵探未

輒再三阻止因此景安常嘆其不聽號令廣福
並無以鞋脚食物糜費爲詞譏謂景安避賊之

事兩相質對均無異詞臣查景安係總督大員

凡有參奏必須情罪適當方爲公允廣福在白

雲山探賊請兵景安因董寧川具報賊衆恐其

冒昧輕進未經發兵尙無不合迨廣福前營黑

夜施放鎗礮緣糧臺鄉勇驚營而起出於有因

次日原應查問至礮子飛入中營之說係景安
查問時比擬設或之詞並無其事凡遇發兵廣
福因偵探未確直言稟阻亦係總理營務者應
稟之詞及景安以廣福不能仰承其意輒行含
怒於派往鄖西之前以已過之事加之阿斥卽
欲對衆枷責已非情理且又出言詈罵更失大
臣之體亦無怪廣福不服頂撞既經衆官求免

而止又復遲忿一時膠泥奈奏誠如

聖諭實屬任性妄爲相應請

旨將景安伯節革退拔去雙眼花翎景安本來多病不能乘騎帶兵留營亦屬無益應令其回京候

旨至廣福歷次出師受傷六處平日打仗素稱勇往

此次頂撞景安出於情急亦由景安自取竇非

無故咆哮被叅誠爲屈抑該員在竹谿一帶熟

悉地方情形且亦明白應懇

恩賞給叅遊職銜仍赴倭什布軍營帶兵堵禦如果
始終出力遇缺再行補用再查頭等待衛烏爾
呼訥於六月二十五日來至臣營計自興安病

痊起程以後又在漢中保寧到處逗遛統計一
年之久察其面無病容雖稱染患脾泄實不足
信並據額勒登保告稱該員向日在營並不出

力現當用人之際未便稍事姑容相應據實奏
奏請

旨將烏爾呼訥革去頭等侍衛作爲披甲留營効力
以爲怠玩不職者戒奏入

上諭內閣曰景安因廣福直言稟阻卽行詈罵已失
待屬員之體又復叅奏柳號併請事竣充發實屬
任性妄爲然此猶過之小者景安大罪在前任河

南巡撫時於賊匪由鍾祥竄至豫省縱令逃逸以致永保亦因此獲譴蔓延數省至今未能殄滅是其惟怯畏賊捏報邀功種種玩愒之處厥罪甚重景安著革去伯爵發往伊犁自備資斧交保寧差遣効力贖罪廣福因糧臺鄉勇中夜驚營施放鎗礮並無鎗子飛及景安中營之事景安亦已供明但在景安前咆哮頂撞究屬不合廣福著降授遊

擊職銜前赴明亮軍營効用又烏爾呼訥前在額勒登保軍營本不出力嗣因病留養興安後逗遛一年之久並不到營現在勒保傳到詢問見其面無病容情殊可惡勒保僅請將該員革去頭等侍衛作爲披甲留營効力未免輕縱烏爾呼訥亦著革職發往伊犁自備資斧効力贖罪

臣
等謹案我

皇上振紀飭綱

識微見隱疊降

諭旨申明賞罰以肅軍政而作士氣此次因川省大
駭賊匪闖入楚境勒保身任經畧未能預爲
防範又不早行調察奏

聞星速派兵會擊

特加嚴懲

訓示周詳至景安叅革廣福一案仰蒙

聖鑒以景安失待屬員之體而廣福有頂撞上官之

咎

權衡功過

大公至正而於景安恇怯邀功諸情節

燭照靡遺

揭其罪狀遣戍示懲於是軍營帶兵人員莫不誠畏

卷之三十一 禮記 祭義 第五十一

誠服奮發自新

盛德

大業所以鼓萬物而不自知也